



REPUBLIKA E KOSOVËS / REPUBLIKA KOSOVA

GJYKATA THEMELORE FERIZAJ

Numri i lëndës: 2023:231158

Datë: 29.04.2024

Numri i dokumentit: 05634351

NË EMËR TË POPULLIT

GJYKATA THEMELORE NË FERIZAJ - Departamenti i Përgjithshëm, divizioni penal, me gjyqtarin e vetëm gjykues Dardan Maloku, me zyrtaren ligjore Ardita Tasholli, në çështjen penale ndaj të pandehurit V.D., me vendbanim në Rrugën "...", komuna Obiliq, për shkak të veprës penale Posedimi i pa autorizuar i narkotikëve, substancave psikotrope ose analoge nga neni 269 paragrafi 1 të Kodit Nr. 06/L-074 Penal të Republikës së Kosovës (tani e tutje KPRK-së), sipas aktakuzës të paraqitur nga Prokuroria Themelore në Ferizaj – Departamenti i Përgjithshëm, PP.II.nr.1432/2023 të datës 26.10.2023, pas mbajtjes së shqyrtimit fillestar, të hapur për publikun, i cili është mbajtur më datë 16.04.2024, në të cilin morën pjesë prokurori i shtetit Sadat Topalli, prokuror në Prokurorinë Themelore në Ferizaj dhe i pandehuri V.D., pas pranimit të fajësisë nga ana e të pandehurit, më datë 16.04.2024 mori dhe publikisht shpalli, kurse më datë 29.04.2024 përpiloi këtë:

A K T G J Y K I M

I pandehuri

V.D. nga i ati A. dhe e ëma B. e gjinisë S., i lindur më datë ... në Prishtinë, me vendbanim në Rrugën "...", komuna Obiliq, me numër personal ..., ka të kryer shkollën e mesme, i martuar, baba i një fëmije të mitur, i gjendjes së mesme ekonomike, shqiptar, shtetas i Republikës së Kosovës.

Ë S H T Ë F A J T O R

Sepse:

Me datë 10.19.2023, rreth orës 22:00, në Ferizaj, në rrugën "..."; i pandehuri pa autorizim ka poseduar substanca apo preparate, të cilat me ligj janë shpallur si narkotik, ashtu që me rastin e

ndaljes dhe gjatë kontrollit nga ana e zyrtarëve policor., tek i pandehuri në veturën e tij VW Golf me targa ..., janë gjetur dhe konfiskuar dy (2) cigare me përmbajtje të substancës narkotike e llojit Marihuanë me peshë të përgjithshme 1.671 gram, të cilën e kishte për përdorim personal.

- Me këtë ka kryer veprën penale **Posedim i paautorizuar i narkotikëve, substancave psikotrope ose analoge** nga neni 269 paragrafi 1 të KPRK-së

Andaj, gjykata në bazë të neneve 4, 7, 8, 17, 21, 38, 42, 43, 69, 70, dhe 269 paragrafi 1 të KPRK-së, si dhe neneve 364, 452 dhe 455 paragrafi 1 të Kodit të Procedurës Penale (KPP-së), të pandehurin e:

G J Y K O N

- I. Me dënim me burgim efektiv në kohëzgjatje prej 8 (tetë) muajve, i cili dënim do të ekzekutohet brenda afatit prej 15 (pesëmbëdhjetë) ditësh pasi plotfuqishmërisë së këtij aktgjykimi si dhe me dënim me gjobë në shumën prej 1,000 (një mijë) euro të cilin dënim i pandehuri është i obliguar ta paguajë brenda afatit prej 60 (gjashtëdhjetë) ditësh pas plotfuqishmërisë së këtij aktgjykimi.
- II. Nëse i pandehuri nuk mundet apo nuk dëshiron ta paguajë dënimin me gjobë, të njëjtit në pajtim me nenin 43 paragrafi 3 të KPRK-së, dënimi me gjobë do të zëvendësohet me dënim me burgim, ashtu që për 20 (njëzetë) euro gjobë të papaguara, i pandehuri do të vuajë 1 (një) ditë burgim.
- III. Në bazë të nenit 269 paragrafi 3 të KPRK-s, KONFISKOHET substanca narkotike e sekuestruar e llojit “Marihuanë” me peshë 1.671 gram.
- IV. Obligohet i pandehuri në emër të shpenzimeve të paushallit gjyqësor të paguaj shumën prej 20 (njëzet) euro si dhe për fondin e kompensimit të viktimave të dhunës shumën prej 20 (njëzet) euro, brenda afatit prej 30 (tridhjetë) ditëve nga dita e plotfuqishmërisë së këtij aktgjykimi.

A R S Y E T I M

1.Rrjedha e çështjes

Prokuroria Themelore në Ferizaj - Departamenti i Përgjithshëm më datë 26.10.2023, ka ngritur aktakuzën PP.II.nr.1432/2023, kundër të pandehurit V.D. për shkak të veprës penale Posedimi i paautorizuar i narkotikëve, substancave psikotrope ose analoge nga neni 269 paragrafi 1 të KPRK-së.

Me datë 16.04.2024, pranë kësaj gjykate është mbajtur seanca e shqyrtimit fillestar në të cilën ishin prezent prokurori i shtetit Sadat Topalli dhe i pandehuri V.D..

Në këtë seancë pas leximit të aktakuzës nga ana e prokurorit të shtetit, i pandehuri ka deklaruar se e ka kuptuar në tërësi aktakuzën dhe veprën penale për të cilën akuzohet dhe se e pranon fajësinë për kryerjen e veprës penale e cila i vihet në barrë andaj gjykata pas dëgjimit të palëve dhe në pajtim me nenin 242 paragrafi 2 dhe 6 të KPP-së, ka marrë aktvendim me të cilin ka aprovuar pranimin e fajësisë nga ana e të pandehurit.

2.Vlerësimi i pranimi të fajësisë

Gjykata pas mbajtjes së shqyrtimit fillestar në të cilin kanë qenë prezentë palët e lartcekura dhe pas dëgjimit të palëve ka marrë aktvendim me të cilin ka aprovuar pranimin e fajësisë nga ana e të pandehurit për veprën penale për të cilën akuzohet ngase ka konstatuar se janë plotësuar gjitha kushtet ligjore të cilat kërkohen me nenin 242 paragrafi 2 të KPP-së dhe se pranimi i fajësisë nga ana e të pandehurit nuk është kundërshtuar nga ana e palëve të cilat ishin prezentë.

Në këtë aspekt gjykata ka konstatuar se i pandehuri e ka kuptuar drejtë natyrën dhe pasojat e pranimi të fajësisë, se pranimi i fajësisë është bërë vullnetarisht nga ana e të pandehurit dhe i njëjti nuk ka qenë i detyruar ose i shtrënguar në asnjë mënyrë që të pranojë fajësinë. Pranimi i fajësisë mbështetet në faktet e çështjes të cilat i përmban aktakuza siç janë: Raporti fillestar i incidentit me numër të rastit 2023-CF-2012 i datës 10.09.2023, deklarata e të pandehurit V.D. e dhënë në polici me datë 10.09.2023, vërtetimi mbi konfiskimin e sendeve me numër 2023-CF-2012 i datës 10.09.2023, Raporti i oficerit i datës 10.09.2023 dhe 11.09.2023, Raporti i testit fushor me datë 26.09.2023, zinxhiri i ruajtjes i datës 11.09.2023 si dhe shkresat e tjera që gjenden në lëndë, po ashtu me rastin e pranimi të fajësisë nga ana e të pandehurit gjykata gjeti se aktakuza lëndore nuk përmban asnjë shkelje të qartë ligjore ose gabime faktike.

3.Gjendja faktike e vërtetuar

Duke u bazuar në të lartcekurat, gjykata vërtetoi këtë gjendje faktike: se i pandehuri V.D., ka kryer veprën penale Posedimi i paautorizuar i narkotikëve, substancave psikotrope ose analoge nga neni 269 paragrafi 1 të KPRK-së, në kohën, vendin dhe mënyrën e përshkruar si në dispozitiv të këtij aktgjykimi.

4. Rrethanat që janë marrë për bazë me rastin e shqiptimit të dënimit

Gjykata me rastin e matjes së dënimit ka vlerësuar që të pandehurit ti shqiptohet dënim me burgim efektiv në kohëzgjatje prej 8 (tetë) muajve, i cili dënim do të ekzekutohet brenda afatit prej 15 (pesëmbëdhjetë) ditësh pasi plotfuqishmërisë së këtij aktgjykimi si dhe me dënim me gjobë në shumën prej 1,000 (një mijë) euro të cilin dënim i pandehuri është i obliguar ta paguajë brenda afatit prej 60 (gjashtëdhjetë) ditësh pas plotfuqishmërisë së këtij aktgjykimi, ngase duke i marrë parasysh të gjitha rrethanat dhe provat të cilat gjinden në shkresat e lëndës, ky dënim do të jetë i drejtë, në harmoni me peshën e veprës penale dhe përgjegjësinë penale të kryesit dhe si i tillë me këtë dënim mund të arrihen qëllimet e dënimit në kuptim të nenit 38 të KPRK-së. Gjithashtu gjykata me rastin e matjes së dënimit ka marrë për bazë edhe rrethanat që ndikojnë në llojin dhe lartësinë e dënimit duke u bazuar në nenet 69 dhe 70 të KPRK-së, ashtu që rrethanë lehtësuese për të pandehurin ka marrë: pranimin e fajësisë në shqyrtim fillestar, faktin se i njëjti është penduar për veprën penale që e ka kryer dhe ka kërkuar falje publike, është baba i një fëmije të mitur si dhe premtimin e tij që në të ardhmen nuk do të kryej vepra të tilla dhe as vepra të tjera penale, kurse rrethanë rënduese mori shkallën e lartë të dashjes nga ana e të pandehurit dhe faktin se i njëjti është recidivist (përsëritës) i veprave penale të llojit të njëjtë dhe atë i shpallur fajtor dhe dënuar me aktgjykimin e Gjykatës Themelore në Ferizaj me numër 2022:042516 i plotfuqishëm me datë 15.08.2023, me aktgjykimin e Gjykatës Themelore në Prishtinë 2019:165474 i plotfuqishëm me datë 15.02.2022 dhe me aktgjykimin e Gjykatës Themelore në Prishtinë 2020:140692 i plotfuqishëm me datë 19.07.2023.

Gjykata vendosi që të pandehurit t'i shqiptoj dënim me burgim si në dispozitiv të këtij aktgjykimi sidomos duke pasur parasysh se me aktgjykimin e Gjykatës Themelore në Ferizaj me numër 2022:042516 i plotfuqishëm me datë 15.08.2023 dhe me aktgjykimin e Gjykatës Themelore në Prishtinë 2019:165474 i plotfuqishëm me datë 15.02.2022, i pandehuri është shpallur fajtor dhe është dënuar pikërisht për vepra penale të llojit të njëjtë, andaj gjykata gjeti se ky dënim nuk ka ndikuar në rehabilitimin e kryesit të kësaj vepre penale dhe nuk ka ndikuar në preventivën personale tek i pandehuri.

Andaj, duke u bazuar në të lartcekurat gjykata konsideron se me dënimin e shqiptuar ndaj të pandehurit mund të arrihen qëllimet e dënimit të parapara në nenin 38 të KPRK-së e që konsistojnë në parandalimin e kryesit nga kryerja e veprave penale në të ardhmen dhe të bëjë rehabilitimin e tij, të parandalojë personat e tjerë nga kryerja e veprave penale, të bëjë kompensimin e viktimave ose të komunitetit për humbjet ose dëmet e shkaktuara nga vepra

penale dhe të shprehë gjykimin shoqëror për veprën penale, ngritjen e moralit dhe forcimin e detyrimit për respektimin e ligjit.

5. Vendimi lidhur më konfiskimin e substancës narkotike

Neni 269 paragrafi 3 i KPRK-së përcakton shprehimisht se: “*Substancat narkotike, substancat psikotrope ose substancat analoge konfiskohen*”. Andaj, duke u bazuar në këtë dispozitë ligjore u vendos si në pikën III të dispozitivit të këtij aktgjykimi.

6. Vendimi mbi shpenzimet e procedurës penale

Duke pasur parasysh natyrën e kësaj çështje penale dhe gjendjen financiare të pandehurit, gjykata duke u bazuar në nenin 452 paragrafi 1 të KPP-së, ka vendosur që ta detyrojë të pandehurin që të paguaj paushallin gjyqësor në shumën prej 20 (njëzet) euro, si dhe duke u bazuar në nenin 36 paragrafi 3 nën paragrafi 3.1 të ligjit Nr. 08/L-109, për Kompensimin e Viktimave të Krimit shumën prej 20 (njëzet) Euro.

Andaj duke u bazuar në të lartcekura gjykata vendosi si në dispozitiv të këtij aktgjykimi.

GJYKATA THEMELORE NË FERIZAJ
Departamenti i Përgjithshëm – Divizioni Penal
2023:231159, me datë 29.04.2024

Zyrtarja Ligjore,
Ardita Tasholli

Gjyqtari i vetëm gjykues,
Dardan Maloku

KËSHILLA JURIDIKE: Kundër këtij aktgjykimi mund të paraqitet ankesë në Gjykatën e Apelit në Prishtinë, në afat prej 30 (tridhjetë) ditëve nga dita e pranimit të të njëjtit. Ankesa në kopje të mjaftueshme i paraqitet Gjykatës Themelore në Ferizaj.